

HIBRU **Zu mbal tuku waņe**

Gabat ande nu Zu mbal afu Yesus tuku son ŋginaig ta nane tuku waņe kuyarna te tugunu teņenmba.

Zu mbal afu Yesus tuku kume tuku saņgri tomba tiņginaig sulumba naņgine tukul maņau ambokok kusrekinaig. Kusrekinaig ta naņgine mbal afunģe piti serniņginaig le nane maņ tukul kame ta dubikinaig. Taņanaig le Yesus dubiwanu gabat andenģe waņe te nane tuku wamdus te-tiwam tuku kuyarna.

Yesus nu ambokok maņau ŋakmba kumumba maņau kitek te-mayokna. Nu kumna sulumba nuņe ndarembi sine muskil nduiye kile-tidiņga siņgine pris gabat suņgo minit. Ta tuku nane maņau ambokok saņgri kugatok ta nduiye kusreka Yesus ndo dubiwaig ŋga nu waņe te kuyarna.

Kuate tuku Kiņo nu eņel kame liniņmba o mbolņge minit

¹ O buk Kuate nu maņau kise kisembi nuņe pasa tugusek tuan taņgo tuku miņģe mbolņge kile-mayokka minanu le sine tuku wa mbuņ kame nane isanu. ² Ismba minnaig le ma ma kugawam tuku ait te mbolņge nu nuņe Kiņo nuņe mbolņge nuņe pasa te-mayokmba sasiniņgana. Aģaņ ndende ŋakmba nu wai mbolņge patikam tuku nu Kiņo nuņe pilna. Tugu mbolņge Kuate nu sakina le Kiņo nuņenģe kilke te te-mayokna. ³ Kuate tuku kilņa nu minit tuku maņau ŋakmba nuņe Kiņo

nuṅe mbolṅge minig le kaṅgerkeg. Nale ndindo minik. Kiṅo nuṅeṅge pasa saṅgrinu sakate le agaṅ ndende ṅakmba naṅgine ma mbolṅge minmba kumumbi piroka minmba minig. Nuṅe Kiṅo taṅge taṅgo tuku une sauke suluna sulumba Kuate Sunḡo Ndindo nu tuku ndinam kumamṅge samba mbolṅge minyokina. ⁴ Taṅana le Kuate nuṅe Kiṅo nyu sunḡo te-mayokna le nu tuku nyu taṅge eṅel tuku nyu liningina. Ta tuku nu nuṅe miroṅ mata eṅel kame ṅakmba liningina. ⁵ Kuate nu nuṅe Kiṅo ta teṅenmba sana.

Ne ye tuku Kiṅo. Kite ye ne tuku Mam mayok kinet ṅgina. *Mune 2.7*

Kuate nu eṅel ande taṅamba sa ndana. Nu maṅ nuṅe Kiṅo sana:

Ye ne tuku Mam mayok kaṅgit.

Ne ye tuku Kiṅo minamṅgat ṅga sana. *2 Samuel 7.14*

Nu eṅel ande taṅamba sa ndana.

⁶ Kuate nuṅe Kiṅo mulum kilke te mbolṅge te-mayokam bafuna sulumba nu nuṅe Kiṅo nuṅe tuku teṅenmba sakina.

Yiṅe eṅel kame, tane nu tuku nyu te-dunḡa nu mbariṅap ṅgina. *Lo 32.43*

⁷ Kuate nu nuṅe eṅel kame tuku teṅenmba sakina.

Yiṅe eṅel kame nane bubre taṅaṅ kile-mayokket.

Yiṅe kukul mbal pa mane taṅaṅ kile-mayokket ṅgina. *Mune 104.44*

⁸ Nu nuṅe Kiṅo tuku pasa teṅenmba sakina.

Ne Kuate. Ne nyu sunḡo ṅak naṅe mbal kulatka minmba minamṅgat. Kugawe nda.

Ne kumumbi naṅe gageu kulatkate.

⁹ Ne mañau tinreknu ndo nzalinu ne mañau ñaigonu ñakmba mbulmba pitaikate.

Ta tuku ye ne tuku Mbara nane mbal ñgamukñge ne sunğomba make pilmba nyu sunğo tinmba gare tinen ñgina. *Mune 45.6*

¹⁰ Kuate nu nuñe Kiño tuku mañ teñenmba sakina. Sunğo, ne tugu mbolñge kilke te-mayokna.

Ne nane wai kuyarmbi samba pilna.

¹¹ Kilke samba ñgisikamñgaik ta ne tañawe nda.

Ne minmba minamñgat.

Kilke samba tawi tañañ urfu patika ñaigonğamñgaik.

¹² Tañawaik le tañgo nu tawi tumba filfilte tañamba ne samba kilke filfilmba kile-sikamñgat.

Nane tawi abonu kilmba tingig tañañ ne samba kilke urfunu kile-sika mañ abonu kile-mayokkamñgat.

Neñge ndo mbilka kisenmba mayok kine nda.

Ne tuku yar mata kugawe nda. Ne minmba minamñgat ñgina. *Mune*

102.25

¹³ Kuate nu mañ lato nuñe Kiño sana:

Ne ye tuku ndinam kumam teñge sanğri ñak minyok mina le ma ma yeñge ne tuku ñgueu mbal ñakmba kile-ibenka ne tuku kupe kum-nemñge patikamñgit ñgina. *Mune*

110.1

Nu eñel ande pasa ta sa ndana. ¹⁴ Eñel kame nane Kuate tuku pasa dubide tuku guwa ndo. Sine afu Kuatenge muskil kile-tidingam tuku mineg mbal nu nane kukulñgit le pro sine tursinğig.

2

Kuate nu ndin mayenu te-mayokna

¹ Kuate tuku Kiŋo nu o mbolŋge minit tukunu sine nu tuku pasa mayenu isgen ta ake wamwamka li ndaka kurauka likube. Sine taŋa ndabe ta sine waŋ taŋaŋ kundu mayenu limba fare fare kumba ka ŋgisikamŋgig.

² O buk Kuate nu eŋel kukulningina le nane Moses tukul tunaig ta son saŋgri ŋak. Siŋgine mbuŋ kame pasa ta lukanaig ta lafunu kumumbi tinaig. ³ Sine siŋgine muskil kile-tidingam tuku pasa mayenu Sunŋonŋe te-mayokmba sakina le nane isnaig mbalŋge sine kubeu siŋginaig. Kile sine pasa mayenu te ake wamwamka likeg ta sine taŋamba ndo lafunu tamŋgig. ⁴ Kuate nu nuŋe pasa ta saŋgri pilemba wam yimyammbi nuŋe saŋgri kile-mayokka wam kitek ke likina. Nu nuŋe nzali dubimba Tukul Guwa tuku saŋgri yimyam niŋge likina.

⁵ Kilke kitek prowam tuku sakig ta kilke ta kulatkam tuku Kuate nu nuŋe eŋel madi ndaningina.

⁶ Kuate tuku pasa mbolŋge ande nu teŋenmba kuyarna.

O Kuate, taŋgo nu ima le ne mara mara nu idus timba minit. Nu ima le ne nu turam tuku kulatkate.

⁷ Ne ait fagnu nu tumba eŋel kame kumnemŋge pilna.

Taŋana sulumba ne maŋ nu tumba te-mayokmba nyu sunŋo tuna.

⁸ Ne agaŋ ndende ŋakmba kilmba nu kumnemŋge patikina.

Mune 8.4-6

Tañamba Kuate nu agañ ndende ñakmba kilmba tañgo kumnemñge patikina. Agañ ande tañgoñge kulat ndakanu tañañ mine ndakate.

Son. Kile ait te mbolñge agañ ndende ñakmba tañgo kumnemñge minig le sine kañger ndakeg. ⁹ Kañger ndakeg ta Yesus kañgermba nu mbolñge kila pileg. Kuate nu tañgo ake sinañ make patika Yesus nu ñakmba tuku kumwa ñga nu tumba ait fagnu eñel kame kumnemñge pilna. Pilna le nu ñakmba tuku kumna sulumba nyu sunjo pasa ñak mayok kina.

¹⁰ Kuate nu agañ ndende ñakmba kile-mayokkina. Ñakmba nu tuku nzali ndo dubiwam tuku minig. Nu tañgo gudommba nuñe kiño kame mayok ka nuñe kilña tugumñge minam tuku idusna sulumba nu kumumbi nane tuku muskil kile-tidingam tuku tañgo rar sunjo tuna. Yesus nu rar ta mbolñge nu sine tuku gabat mayok ka sine tuku muskil kile-tidinge siñgit.

¹¹ Tañgo nane Kuate tuku mbal mayok kambim tuku ande nu atrau piro biyit ta nane nu ndon tugu ndindo. Ñakmba Kuate tuku minig. Ta tuku siñgine Sunjo nu sine yabu ndaka yiñe maib kame ñga ¹² sine ndon minam tuku Mam nuñe teñenmba sana.

Mam Kuate, ye ne tuku nyu sunjo ta yiñe maib kame ndon te-mayokmba saka minamñgit.

Ye nane mbal ñgamukñge munembi ne tuku nyu tedungamñgit ñgina. *Mune*

22.2

¹³ Nu mañ kuyar ande mbolñge teñenmba sakina.

Kuate, ye ne tuku sañgri tomba tiñget ñgina. *Aisaia 8.17*

Pasa ande mata tenemba.

Ye yiŋe maib kame Kuatenge ye sina ta ndoŋ minet
ŋgina. *Aisaia 8:18*

¹⁴ Kuate nu Yesus tuna mbal nane ŋgarosu ŋak. Ta tuku Kristus nu sine tanaŋ ŋgarosu ŋak mayok kina. Tanaŋba nu maŋau ta dubimba nu kumna. Nu kumna ta tiŋga kume tuku saŋgri Satan te-ibenŋa sulumba ¹⁵ sine kumam tuku kuru-kuruka mineg ta sine tuku muskil kile-tidiŋga kuru kuru wam ta tukulna.

¹⁶ Nu eŋel kame turkam tuku nde ndakina ta kilimok. Nu sine Abraham tuku tugu ŋakmba tursiŋgam tuku ndekina. ¹⁷ Ta tuku nu nuŋe maib kame minig tanaŋ mayok kina. Wam ta mbolŋge ndo nu sine tuku pris suŋgo mayok kambim kumuŋ. Nu kumna sulumba nu Kuate tugumuŋge sine mapeka sine tuku atrau piro kumumbi biyit le Kuate nu sine tuku une sauka gilaiŋgate. ¹⁸ Nu sine tango tanaŋ mayok kina le Satan nu tagomba minna ta nu piti ta kamusna tukunu kile nu sine tago mbolŋge mineg ta nu sine tursiŋgam kumuŋ.

3

Yesus nu Moses lite

¹ Tira kame, Kuatenge sine ŋakmba wikina le sine nu tuku kuasmbi ndindo mineg. Nu Yesus kukulna le nu sine tuku pris suŋgo minit. Ta tuku siŋgine wamdus ŋakmba Yesus ndo idus tibe.

² O buk Moses nu Kuate tuku mbal ŋgamukŋge piro ke mayemba minna. Tanaŋba ndo Yesus nu Kuatenge piro tuna ta nu piro ke mayena.

³ Nale arŋeŋ piro mayenaik ta Yesus nu Moses lite. Tango ande wande pilit ta sine wande tuku

nyu te-du ndangeg. Sine tango tuku nyu te-dungeg.
 4 Wande ñakmba tanjonje patikade ta Kuate nu
 agan ñakmba tugu. 5 Moses nu piro tango ndo
 Kuate tuku mbal ñgamuknje piro mayena. Kuate
 nu ñgumnenga wam kile-mayokkina ta nu wam
 ta tuku saka minna. 6 Kristus nu Kuate tuku
 Kiño minmba Kuate tuku mbal ñgamuknje piro
 mayena. Nu mbal ta tuku tugu. Sine wamdus
 sangrinu pilmba sinjine Sunjo tuku pasa alonu
 tairnga minbe ta sine Kuate tuku mbal nu tuku
 wande tajan mineg.

Ngamuñgal kilba tukul ndakam tuku pasa

7 Sine Tukul Guwa tuku pasa ise mayebe. Nu
 tejenmba sana.

Kile ait te mbolnje tane Kuate tuku pasa isig te
 8 tanjine mbun Moses ndon ma baknu mbolnje
 minnaig tajan ñgamuñgal tukulmba kilba
 tukul ndakap.

Nane ye tuku wamdus mukuknu te gubra pile sam
 tuku tago-tagonaig.

9 Nane yar 40 ye tuku piro sangrinu yimyam
 kangerkumba

ta tuku nda idusmba ye tago-tagoyumba minnaig.

10 Ta tuku ye mbal ta tuku gubra tumba nane
 tuku tejenmba saken. Nane tuku wamdus
 tugusek kuga. Nane ye tuku manau katese
 ndade ngen.

11 Ye nane tuku gubra sunjo tumba pasa
 sangrinumbi tejenmba saken. Nane ye ndon
 mabte nda ngen. *Mune 95.7-11*

Tukul Guwa nu tajaamba Kuate tuku minje pasa
 sakina.

¹² Tira kame, tane rironj mayewap. Ande tane ngamuknge wamdus tugusek kugatok minmba Ku-ate abo minmba minit nu talamba pitaiwikat.

¹³ Ki ait mindek tangine tangine munju sanjri pileningap. Tane kile abo njak minig ait mbolnge manjau ta kusre ndawap. Tane tanja ndawap ta une manjau tanje tane didikuwa le tangine ngamunjal tukulkikat. ¹⁴ Ambonga sine Kristus wamdus ndindombi tigenj. Sine manjau ta kusre ndamba tanjamba ndo minbe ta sine nu tugumnge gare njak minamngig.

¹⁵ Kuate tuku pasa wam ta tuku tenjemba sakate. Kile ait te mbolnge tane Kuate tuku pasa isig te tangine mbunj kame tananj ngamunjal tukulmba kilba tukul ndawap nga sakate.
Mune 95.7-11

¹⁶ Tane idusap. Ima kate ngamunjal tukulmba kilba tukulnaig e? Moses nu nane njakmba kilmba Isip kusremba kinaig mbal ta. ¹⁷ Ima kate tuku Kuate nu yar 40 mbolnge gubra tina e? Nane wam njaignu ke lika ma baknu mbolnge kume farnaig mbal ta. ¹⁸ Ima kate tuku Kuate nu pasa sanjrimbi nane ye ndonj mabte nda ngina e? Nane nu tuku pasa ismba dubi ndanaig mbal ta. ¹⁹ Nane Ku-ate talamba nu kumunj kuga nga idusnaig tukunu nane nu ndonj mabte ndakinaig.

4

Kuate nu tanjo ndonj mabtam tuku iduste

¹ Kuate nu tanjo afu nu ndonj mabtam tuku pasa sanjrinu pilna ta kile minit. Kuga ndate. Ta tuku sine kuru-kuruka kurau mayebe. Sine Kuate

ndonj mabtam tuku wam lisingikat. ² Sine singine mbunj kame buk minnaig tanañ kile mata pasa mayenu iseg. Nane pasa mayenu ismba talakinaig tukunu pasa ta nane tur ndakina. ³⁻⁵ Sine nu tuku pasa ismba son ngeg mbal ndo Kuate ndonj mabta mineg. Kuate nu tugu mbolñge agañ ndende ñakmba kile-mayokka nuñe piro ñakmba sugluka mabtina. Kuate tuku pasa mbolñge ande nu mara 7 tuku teñenmba kuyarna.

Kuate nu mara 7 mbolñge nuñe piro ñakmba sugluka mabtina ñga kuyarna. *Mulum Pasa 2.2*

Afu nu ndonj mabtam tuku Kuate nu sakina ta nane nu talamba pitainaig le nu nane tuku teñenmba sakina.

Ye gubra sunjo tumba pasa sangrinumbi teñenmba saken: Nane ye ndonj mabte nda ñga saken. *Mune 95.11*

⁶ Pasa tanje sine teñenmba tumsingit. Kuate nu tanjo ndonj mabtam tuku iduste. Nane ambonga Kuate tuku pasa mayenu isnaig mbal ta nane nu talamba nu ndonj mabte ndakinaig. ⁷ Ta tuku ngumneñga Kuate nu tanjo ndonj mabtam tuku ait ande te-mayokna ta kite ki ait noten. Ye David tuku pasa buk satinjit ta Kuate nu teñenmba sakate.

Kile ki ait te mbolñge tane Kuate tuku pasa isig te ngamunjal tukulmba kilba tukul ndawap ñgate. *Mune 95.7-8*

Kuate ndonj mabteg wam kilke mbolok kuga

⁸ Yosua nu Israel mbal kilmba Kanan kilke mbol promba nane Kuate ndonj mabte ndakinaig. Nane tanjamba mabtinaig kande Kuate

nu ngumnenḡa maḡ mabtam tuku ait ande sa ndakina kande. ⁹ Kuate nu nuḡe piro ke suluna sulumba mabtina taḡamba ndo nuḡe mbal nu tugumḡe mabtamḡaig. ¹⁰ Sine Kuate ndoḡ mabteg ta nu nuḡe piro sugluka mabtina taḡamba ndo sine siḡine piro tuku saḡgri kusremba Kuate tuku saḡgri tomba tiḡa mabteg. ¹¹ Sine taḡamba nu ndoḡ mabtam tuku wamdus saḡgrinu pilmba dirnaḡube. Ande nu pasa mayenu ismba talakuwa ta nu siḡine mbuḡ kame taḡaḡ Kuate ndoḡ mabte nda.

¹² Kuate tuku miḡe pasa saḡgri ḡayo abo ḡak minmba minit. Pasa ta kame bagi agonu limba nu agok ḡayo. Nu taḡo tuku ḡgamuḡal ndu-aseмба ka sinam nziḡe kilke mbolok maḡau samba mbolok maḡau ḡgamu fetka kilimok kilemayokkate. Taḡo tuku wamdus nzali kise kise kam idusde ta nu kiḡeḡka kila minit. ¹³ Agaḡ ande Kuate am mbolḡe kuirka minam kumuḡ kuga. Sine tuku wam ḡakmba nu am mbolḡe mayokḡe minig. Ngumnenḡa nu sine pilesiḡuwa le sine ta son ḡgamḡig.

Yesus nu sine tuku pris suḡo

¹⁴ Siḡine pris suḡo nu samba mbol kina sulumba kile Kuate tugumḡe minit. Nu Kuate tuku kiḡo nuḡe Yesus. Ta tuku pasa mayenu iseg te biye debe. ¹⁵ Siḡine pris suḡo nu kilke te mbolḡe minmba tago ḡakmba nu mbolḡe pronaig ta nu mbar ndana. Tago mbolḡe sine saḡgri kugatok ta nu kila pilna sulumba sine sinasiḡit. ¹⁶ Ta tuku sine kuru kuru kugatok wamdus bulok Kuate tugum kab. Nu ake sinaḡ taḡo make patika

turkam iduste. Sine nu tugum kab ta nu sine mapeka siŋgine piti ait mbolŋge tursiŋgit.

5

¹ Sine taŋgo ŋgamukŋge taŋgo afu atrau piro biyam tuku mayok kinig ta nane sine ŋakmba tuku Kuate am mbolŋge pirokade. Sine agaŋ afu Kuate tambim tuku niŋgeg le nane Kuate tuku patikade sulumba siŋgine une saukam tuku agaŋmor bale farmba atraukade. ² Pris mbal nane taŋgo ndo nane sine taŋaŋ mbar ŋak. Ta tuku nane katese ndade mbal mbarde mbal wamdus bafumbi kulatka piroka minig. ³ Pris mbal mbar ŋak tukunu nane taŋgo tuku une saukam tuku agaŋmor bale farmba atraukade ta naŋgine une tuku turmba atraukade.

⁴ Taŋgo ande nu nuŋe wamdusmbi atrau piro biyam tuku nuŋe nyu te-mayokam kumuŋ kuga. Kuatenge madiniŋgit mbal ndo piro ta biyam kumuŋ. Abo abo nu Aron taŋamba madina. ⁵ Kristus nu mata nuŋe wamdusmbi pris suŋgo mayok kambim tuku nu nuŋe nyu te-mayok ndana. Kuatenge Kristus nu piro ta kam tuku madina sulumba sana:

Ne ye tuku Kiŋo. Kite ye ne tuku Mam mayok kinet
ŋgina. *Mune 2.7*

⁶ Kuate tuku kuyar pasa ande teŋenmba sakate.

Ne Melkisedek taŋaŋ pris minmba minamŋgat
ŋgate. *Mune 110.4*

⁷ Yesus nu kilke mbolok taŋgo minmba nuŋe kume mbolŋge Kuatenge nu tuku muskil te-tiwam kumuŋ ŋga Kuate yabaŋmba suŋgomba malmbika sarsarmba minna. Nu wamdus ndindo ŋak Kuate

kumnemnge minna le Kuate nu tuku yaban pasa ta isna.

⁸ Yesus nu Kuate tuku Kiŋo ta nu mata piti sugo kamusna. Piti ta mbolnge Kuate kumnemnge minam tuku wam ta nu kila pile mayena. ⁹⁻¹⁰ Nu Kuate tuku nzali ndo dubimba piti kamusmba minna ma ma nu kumumbi mayok kina. Nu kumumbi mayok kina le Kuate nu nuŋe Kiŋo ta tejenmba sana. Ne Melkisedek taŋaŋ pris sungo minmba minamngat ngina. Nu pris sungo mayok ka sine nu tuku pasa dubiweg mbal sine muskil kile-tidinga abo minmba minam tuku singit.

Sine Kristus tuku wam ŋakmba kila pilmba sugokube

¹¹ Sine Melkisedek tuku wam afu gudommba satingam iduseg ta tane pasa isam tuku ngaro wasni ŋak pronaig tukunu sine tugunu ŋakmba tumtingam tuku piro karenkeg. ¹² Tane o buk Kuate tuku pasa isnaig ta kile tane nane afu tumningam tuku ta tane kumuŋ kuga. Sine maŋ pasa ndui ta tugu patika tumtingam iduseg. Tane kiŋo dabro taŋaŋ amo ndo nyam kumuŋ. Tane nyamagaŋ karennu nyam kumuŋ kuga. ¹³ Kiŋo dabro amo ndo nyumba minit taŋaŋ tane maŋau tiŋreknu katese ndamba mbirmbarmba minig. ¹⁴ Tango sugonge ndo nyamagaŋ karennu nyade. Nane mara mara maŋau tiŋreknu dubika wam magenu ŋaigonu pitik katesede sulumba wam magenu ta ndo dubikade.

6

¹ Sine Kristus tuku pasa amo suk ta buk ismba kila pilgen tukunu kile sine nu tuku pasa nyam-

agan kareṅnu suk ta isam tuku wamdus pilmba ka sugokube. Sine makek maṅ lato lato sigrika wande palmbim kumuṅ kuga. Sine buk wam kame alo kugatok dubikigeṅ ta kusreka ṅgamuṅgal biye mbilmba makek kareṅnu siriwanu taṅaṅ² kule pisne maṅau e ko taṅgo mbolṅge wai patinu tuku maṅau sine kila pilgeṅ. Sine taṅgo kummba maṅ tiṅga e ko mbal ṅaigonu lafu ṅayonu tumba minmba minam tuku pasa ta mata sine buk kila pilgeṅ. Ta tuku kile sine pasa alo sugo ṅak isam tuku wamdus pilmba ka sugokube.³ Kuate nuṅe ndin tumsiṅguwa ta sine ndin ta mbolṅge sug-okamṅgig.

⁴ Nane afu Kristus tuku wam katese mayemba maṅ kusrewaig ta nane kile-luka kilam tuku ndin ande kaṅger ndaweg. Ta ndaṅam? Kuate tuku bulu taṅge nane tuku wamdus kilṅaṅina. Kuate nu ake sinaṅ taṅgo make patikate wam ta naṅgine wamdus sinamṅge kamusnaig. Nane Tukul Guwa mata tinaig.⁵ Nane Kuate tuku pasa ismba tagonaig ta mayenu ṅga idusnaig. Kilke kitek tuku saṅgri minmba minam tuku ta mata kamusnaig.⁶ Nane Kristus tuku wam ṅakmba ta kila patika maṅ kusrekuwaig ta nane Kuate tuku Kiṅo ṅgumnemba nu tumba naṅgine waimbi lato maṅ ail kazrai mbolṅge daṅṅanu sukde. Nane nu tuku nyu ṅayo silide le ṅakmba kaṅgerde. Ta tuku nane ṅgamuṅgal biye mbilam tuku ndin ande mine ndakate.

⁷ Tane kilke tuku maṅau kaṅgerap. Mara mara sawe piymba kilke mbolṅge ndekate ta kilke nu sawe tate sulumba taṅgo tuku piro turka nyamagan magenu tiṅgade ta Kuate nu kilke ta nyaro

mayenu tuwit. ⁸ Kilke ande sawe tate sulumba anja njaigonu prode ta kilke ta piro kugatok. Kuate nu kilke ta kasuram bafute. Ngumnenga nu kilke ta piyamngat.

⁹ Tira kame, sine tane pasa pitinu satinngig ta Kuate nu tane mbolnge tanawe nda nga sine iduseg. Kuate nu tane tuku muskil kile-tidinge tinnguwa le tane nu kanjeramngaig. ¹⁰ Tane Kuate tuku kume purmba nu tuku mbal turka minig wam ta Kuate nu gilainge nda. ¹¹ Tane njaakmba tanjine manau mayenu ta biye demba minap le ma ma wam tairnga minig ta alonu promba tane tumail pulutingamngat. ¹² Tane kanyummba ngaro wasni njak mine ndakap. Kuate nu tanjo mbolnge wam magenu kamngit nga sakina ta o buk nane afu nu kumun nga ngamungal mukuk tairnga minnaig ma ma kile nane Kuate tugumnge kanjerkade. Tane nane tanan minap.

¹³ O buk Kuate nu wam mayenu ande kam tuku Abraham sana ta nunje pasa sanjri pilewam tuku Sunjo ande nu limba mine ndakina le nu nunje nyu tambi pasa sanjri pilemba tenjenmba Abraham sana: ¹⁴ Ye Sunjo. Ye sinjka ne mbolnge wam mayenu kamngit. Yenge ne tuku ndare te-tugewi le sunjokamngat nga Abraham sana le ¹⁵ nu ngamungal mukuk tairnga minna ma ma tina.

¹⁶ Sine tanjo sinjine pasa sanjri pilewam tuku sinjine nyu tambi sa ndakeg. Sinjine mbara nu tuku nyumbi sine pasa sanjri pileweg. Manau ta mbolnge ande nu sine tuku pasa pitaiwam kumun kuga.

¹⁷ Kuate nu nunje mbal mbolnge wam mayenu

kam tuku sakina ta nu wamdus biye mbil ndamba sinja kamngat nga sine idusbe nga nu tanjo tuku manau dubimba nuje nyumbi nuje pasa sangri pilena. ¹⁸ Kuate nu pasa sakate ko nuje nyumbi sangri pilete wam ar ta mbilka kise mayok kine nda. Nu yabrikam kumuŋ kuga. Sine afu Kuatenge tursinjuwa nga kua ka nu tugum kineng mbal sine nu tuku pasa biye demba ngamungal mukuk alonu tairnga minbe nga nu wam armba te kilemayokkina. Nu nuje pasa sakina sulumba man nuje nyumbi sangri pilena.

¹⁹ Wam armba ta mbolnge sine nu tuku pasa alonu tairnga mineg mbal wan anja ndinkanu tajan bike ndakeg. Singine anja ta samba mbolnge tukul tawi sinamnge Kuate tugumnge minit. Purkam kumuŋ kuga. ²⁰ Yesus nu Melkisedek tajan pris sunjo minmba nu ambonja sine tuku ndin wakeimba sinam kumba sinenu nga Kuate tumailamnge pris piro biymba minmba minit.

7

Melkisedek nu pris mbal njakmba liningina

¹ Melkisedek nu tanjo sunjo nyu njak ma ande nyunu Salem kulatkina. Nu Kuate tuku pris minna. Mara ande Abraham tanjo sugo afu ndon kame bumba nu nane njakmba kile-ibenka nu luka kumba ndinnge Melkisedek te-silikina le nu nyaro pasa tuna. ² Tanjana le nu Melkisedek nu tanjo sunjo nga nuje agan ndende njakmba manjur 10 patika ande tumba nu tuna.

Melkisedek nyu tugunu ta Manau Tinreknu tuku Gabat. Nu kulatkina ma Salem nyu tugunu ta

Wamduş Bulok. Ta tuku nu mata wamduş bulok tuku gabat. ³ Melkisedek tuku ina mam nu tuku wa mbuŋ kame tuku pasa ande ta tuku mine ndakate. Nu prona tuku tugu e ko kumna tuku tugu ta sine gilai. Nu wam ta kugatok taŋaŋ minna. Nu Kuate tuku Kiŋo taŋaŋ nu pris minmba minit.

⁴ Melkisedek nu siŋka nyu sunŋo. Singine mbuŋ sunŋo Abraham tuku wam kaŋgerap. Nu gabat afu ndoŋ kame buna sulumba gabis agaŋ ndende kilna ta maŋgur 10 patika ande tumba Melkisedek tuna. ⁵ Ngumnenga Levi tuku mbuŋ afu atrau piro biyam tuku Kuatenŋe madiniŋina. Nane atrau piro biynaig sulumba naŋgine mbal tuku agaŋ ndende maŋgur 10 patika ande didika kilnaig. Nane naŋgine mbal liniŋinaig ta tuku kuga. Nane ŋakmba Abraham tuku mbuŋ. Nane Moses tuku tukul ande dubimba naŋgine mbal tuku agaŋ ndende kilnaig. ⁶ Melkisedek nu Levi tuku ndare kuga. Abraham nu agaŋ ndende maŋgur 10 patika ande tumba nu tuna le Melkisedek nu sunŋo tukunu nu ndek yaimba kilna. Nu kilna sulumba nu Abraham nyaro pasa tuna. Abraham nu ake taŋgo kuga. Kuate nu taŋgo mbolŋge wam mayewam idusna sulumba nu Abraham pasa mayenu ta tuna.

⁷ Ima nu sunŋo? Taŋgo nu nyaro pasa tuwit ta e ko nyaro pasa tate ta? Taŋgo nu nyaro pasa tuwit nu sunŋo. Ta tuku Melkisedek nu siŋka Abraham lite. ⁸ Levi tuku mbuŋ afu naŋgine mbal tuku agaŋ ndende maŋgur ande kilnaig ta nane taŋgo ndo ŋakmba kume far sulunaig. Melkisedek nu Abraham tuku agaŋ ndende maŋgur ande kilna ta

kuyar pasa nu tuku tenemba sakate. Nu abo ᅇak minmba minit ᅇgate.

⁹⁻¹⁰ Melkisedek nu ndinᅇge Levi tuku mbuᅇ Abraham kaᅇgerna le ait ta mbolᅇge Levi kugatok ta nu mbuᅇ nuᅇge tuku funᅇgul sinamᅇge minna. Abraham nu nuᅇge aᅇaᅇ ndende maᅇgur 10 patika ande Melkisedek tuna ta nu nuᅇge ndare Levi tuku turmba Melkisedek tambinu taᅇaᅇ kina. Ta tuku kile Levi tuku mbuᅇ afu naᅇgine mbal tuku aᅇaᅇ ndende ndui ndui yaika kilig ta nane pris sunᅇgo Melkisedek li ndade.

Yesus nu Aron lite

¹¹ Kuate nu Levi tuku tugu Aron tuku ndare nane pris piro biymba kulatkuwaig ᅇga nu tukul maᅇau taᅇgo pino dubiwam tuku te-mayokna. Naᅇgine piro ta mbolᅇge taᅇgo pino Kuate am mbolᅇge kumumbi mayok kinaig kande pris kitek ande mayok nda kina kande. Pris kitek mayok kina ta nu Aron tuku ndare kuga. Nu Melkisedek taᅇaᅇ mayok kina.

¹² Pris kitek mayok kuwa ta tukul maᅇau kitek turmba mayok kinit. Tukul ambokok kugate.

¹³ Pris kitek ye sakit ta nu Levi tuku tugu kuga. Nu Yuda tuku tugu. Yuda tuku mbuᅇ ande atrau mbain mbolᅇge atrau ndakina. ¹⁴ Singine Sunᅇgo Yesus nu Yuda tuku tugu mbolᅇge prona wam ta sine ᅇakmba kila. Moses nu atrau piro biyam tuku Israel mbal sanᅇgina ta nu Yuda tuku nyu te-mayok ndana. Ta tuku tukul maᅇau ambokok sinamᅇge Yuda tuku tugu ande pris piro biyam kumuᅇ kuga.

¹⁵ Pris kitek Melkisedek taṅaṅ mayok kina wam ta mbolṅe sine kilimok kaṅgereg. Maṅau kitek turmba mayok kina. ¹⁶ Yesus nu pris mayok kina ta tukul ande dubimba pris mayok nda kina. Nuṅe mbuṅ ande pris piro biye ndakina. Nu abo ṅak minmba minam tuku nuṅe saṅgri tambu nu pris mayok ka piro ta tina. ¹⁷ Kuatenṅe nu tuku teṅenmba sakina. Ne Melkisedek taṅaṅ pris minmba minamṅgat.

¹⁸⁻¹⁹ Ambokok maṅau ta gisleknu. Taṅgo pino tur ndakina. Tukul maṅau mbolṅe nane tiṅreknu mayok ndakinaig le Kuate nu maṅau ta te-sina. Kile maṅau kitek Yesus mbolṅe alonu tamṅgig ṅga tairṅga mineg maṅau ta kumuṅ. Sine nu mbolṅe kumumbi mayok ka Kuate tugum kineg.

²⁰⁻²¹ Pris ambokok nane atrau piro biyam tuku Kuate nu sanṅgina ta nuṅe nyumbi pasa saṅgri pile ndana. Nu Yesus pris mayok kambim tuku sakina ta nu nuṅe nyumbi pasa ta saṅgri pilemba sana: Ye Sunṅo. Ye yiṅe pasa yiṅe nyumbi saṅgri pilemba saken. Ye wamdus mbilmba kisemba sake nda. Ne mara mara pris minmba minamṅgat ṅgina.

²² Kuate nuṅe pasa saṅgri pilemba nu Yesus pris minmba minam tuku pilna. Ta tuku nu pasa kitek Kuatenṅe katna ta kulatka minwa le alonu kugawe nda. Minmba minamṅgat. Ta tuku pasa kitek taṅge o buk Moses ndoṅ pasa katna ta lite.

²³ Pris ambokok nane ṅakmba kume likinaig. Ta tuku nane lafu-lafuka pris piro biyamba minanu.

²⁴ Yesus nu abo ṅak minmba minit tukunu nuṅe atrau piro kusrewe nda. ²⁵ Nu mara mara abo minmba samba mbolṅe Kuate tugumṅge taṅgo

tuku yabaŋmba minit. Nane afu nu tuku piro tuku sangri tomba tiŋga Kuate tugum kinig mbal nu nane tuku muskil kile-tidiŋga minit.

²⁶ Yesus nu kumumbi sine tuku atrau piro biyit. Nu purfeŋnu. Mbar ande nu mbolŋge mine ndakate. Nu sine taŋgo taŋaŋ mine ndakate. Nu une kugatok. Kuatenŋe nu te-dunŋa samba mbolŋge pilmba nyu suŋgo tuna. ²⁷ Pris ambokok nane mara mindek ambonga naŋgine une sauka ŋgumneŋga taŋgo pino tuku une saukam tuku agaŋmor bale farmba atraukanu ta Yesus nu taŋa ndana. Nu nuŋe ŋgarosu kumam tuku pilna le afuŋge nu balenaig le atraukam nduina. Not ndo. ²⁸ Tukul maŋau sinamŋge Kuate nu sine taŋgo une ŋak kilmba atrau piro biyam tuku patikina. Ngumneŋga nu pris kitek piro biyam tuku Kuate nu nuŋe nyumbi pasa sangri pilena ta nu nuŋe Kiŋo nuŋe pilna. Nuŋe Kiŋo ta nu purfeŋnu minmba nu pris suŋgo kumumbi mayok ka taŋamba minmba minit.

8

Yesus nu pasa kitek kulatkate

¹ Ye pasa ŋakmba sake likit ta tugunu teŋenmba. Singine pris suŋgo Yesus nu samba mbolŋge Kuate tuku ndinam kumamŋge minyok minit. ² Nu samba mbolŋge Kuate tuku wande tugusek ta sinamŋge nuŋe atrau piro kumba minit. Wande ta Kuatenŋe pilna tuku. Taŋgoŋge pile ndakinaig.

³ Pris sugo nane agaŋ yimyam Kuate tumba agaŋmor kilmba bale farde. Nane atrau piro ta ke likam tuku pris nyu tinaig. Singine pris suŋgo nu

mata piro ta kam tuku nyu tina. Nu aganj ande Kuate atraukam kumuņ.

⁴ Yesus nu kilke te mbolņge minit kande nu atrau piro biye ndakate kande. Pris gudommba Moses tuku maņau mbolņge tukul dubimba aganj yimyam kilmba Kuate atrauka tuwig. ⁵ Kilke te mbolņge atrau piro kade mbal nane samba mbolņge piro tugusek ta tuku kanunu ndo kade. Moses nu tawi wande palmbim bafuna le Kuate nu wam pagumba sana:

Ne isa. Ne buk tabe mbolņge minna le ye wande kanunu te-mayokmba tumnen taņamba ndo pale ņgina. *Kisim Bek 25.40*

⁶ Kuate nu alonu sunğomba prowamņgaig ņga pasa kitek katna. Kile Kristus nu alonu ta kile-mayokkate. Pasa kitek tuku alonu sunğokanu pasa ambokok lite. Ta tuku atrau piro Kuate nu Kristus tuna taņge pris mbal tuku piro ambokok mata lite.

⁷ Kuate nu Moses ndoņ pasa katna ta sinamņge taņgo pino kumumbi minnaig kande nu maņ pasa kitek kat ndana kande. ⁸ Kuate nu tukul pasa kumnemņge minnaig mbal nu nane ndoņ pasa ņak minmba teņenmba sakina.

Ye Sungo, ye satinğamņgit. Ait ande prowa le ye Israel mbal ndoņ Yuda mbal turmba pasa kitek saņgrinu katamņgit.

⁹ Ye o buk Israel mbal tuku mbuņ turka ndin te-mayoken le Isip kusremba kinaig ait mbolņge nane pasa saņgrinu katen taņamba kuga. Nane ye tuku pasa ta dubi maye ndamba kusrenaig le ye nane ņgumneniņgen.

- 10 Ye Sungo ye satinḡamḡgit. Nḡmnenḡa ait kumunḡuwa le ye pasa kitek tenḡmba Israel mbal ndoḡ katamḡgit. Ye yiḡe tukul pasa ḡakmba nane dubi magekam tuku nane tuku ḡgamunḡgal sinamḡḡe patike likamḡgit. Ye nane tuku Mbara Sunḡo mini le nane yiḡe mbal minamḡḡaig.
- 11 Nane nanḡine kilke tuma mbal nanḡine ndare Kuate tuku kila pilwaig ḡḡa maḡ tumḡḡe nda.
- Nyu ḡak nyu kugatok mbal nane ḡakmba ait ta mbolḡḡe ye kila minamḡḡaig.
- 12 Ye nane mapeka nanḡine wam ḡaigonu sauke ninḡamḡgit. Tanḡawi sulumba ye nane tuku une ḡakmba ḡilainḡamḡgit ḡḡina. *Yeremia 31.31-34*
- 13 Kuate nu pasa kitek katam saka nu pasa ambokok te-sina le piro kugatok minit. Nu piro kugatok minmba ḡḡisinu bafute.

9

Kuate mbarinḡam tuku kilke mbolok tawi wande

- 1 Pasa ambonḡḡa Kuate nu Moses ndoḡ katna ta nane ta sinamḡḡe fare fare Kuate mbarinḡ ndanaig. Nane tukul afu dubika nu mbarinḡnaig. Nane nu mbarinḡam tuku kilke te mbolok tawi wande pilnaig. ² Nane wande tumailamḡḡe bulu ande mbain mbolḡḡe pilnaig. Tukul bret Kuate am mbolḡḡe patikinaig tuku mata mbain ta mbolḡḡe minnaig. Tawi wande ta nyunu tukul wande. ³ Tukul wande ta ḡgamunḡḡe malanḡa tukulanu tawi sunḡokanu minna. Tawi ta ḡḡumnemḡḡe tawi ma ande minna ta nyunu tukul wande sunḡo.

⁴Wande ta sinamɓe mbain ande agaɗ afu pasokanu le mundur magenu prowanu ta minna. Mbain ta nane golmbi wakeinaig. Kuate nu Israel mbal ndoɗ pasa katna ta tuku bokis mata minna. Nane ɗgaronu golmbi wakeinaig. Ndamе арmbа tukul pasa kuyaranu ɗak, gol waim mana fudiɗndo ɗak, Aron tuku ndumndum kuzru prona ta ɗakmba bokis sinamɓe patikinaig. ⁵Bokis mbolɓe eɗel арmbа wakeika patikinaig. Eɗel ar ta magenu ndo kilɗa ɗak. Nale nakile salmban kuitka bokis tukulnu soɗginaik. Kuate nu taɗgo tuku mbar saukam tuku pris suɗgo nu bokis tukulnu ta mbolɓe agaɗmor ndarenu bareɗanu. Sine kile tawi wande tuku agaɗ ndende ɗakmba satinɗam tuku ait kuga. ⁶Nane taɗamba tawi wande tuku agaɗ ndende ɗakmba patike likinaig.

Pris mbal nane mara mara wande tumailam ta sinam kumba atrau piro yimyam kumba minnaig. ⁷Tawi ma ɗgumɓe minna ta pris suɗgo ndo nu wande ta sinam kambinu. Mara mara kuga. Yar ndindo sinamɓe ki ait ndindo ndo nu wande ta sinam kambinu. Nu kambim ɗga agaɗmor ndare kilmba nuɗe mbar, taɗgo pino tuku mbar, mbar afu nane kumba kamus ndanaig ta ɗakmba saukam tuku Kuate atraukanu. ⁸Maɗau ta mbolɓe Tukul Guwa nu teɗenmba sine tum-sinɗit. Ambokok maɗau sinamɓe tukul wande tumailamɓe atrau piro kuga ndawa ta ake taɗgo nu tukul wande suɗgo ɗgumɓe ta sinam kumba Kuate tugum kambim kumuɗ kuga.

⁹Tawi wande ta maɗau kitek te tuku kanunu ndo. Maɗau ta sinamɓe nane Kuate mbarinɗam ɗga agaɗ yimyam Kuate tuku patika agaɗmor

kilmba bale farmba atrauka taɲamba taɲamba minnaig. Nane taɲanaig ta naɲgine mbar maɲau tuku piti naɲgine wamdus sinamɲge minnaig. ¹⁰ Nane kule le nyamagaɲ tuku tukul ɲgarosu agaɲ ndende minyaɲge likam tuku tukul ta ndo dubika minnaig. Tukul ɲakmba ta ɲgarosu tuku ndo. Nane tukul kame ta dubika minwaig le Kuate nu maɲau kitek te-mayokuwa le tukul kame ta saɲgri ku-gawamɲgaig.

¹¹ Nane tukul maɲau dubika minnaig le ta ɲgamukɲge Kuate tugumɲge ɲgamuɲgal mukuk ɲak minam tuku maɲau prona. Kristus nu pro maɲau ta tuku pris suɲgo mayok kina. Nu Kuate tuku wande sinam kumba ka pris suɲgo piro biyit ta kilke mbolok wande kuga. Samba mbolok wande tugusek. Taɲgoɲge pile ndakinaig tuku. ¹² Nu wande ta tuku tukul wande suɲgo nduiye sinam kina. Nu pris suɲgo ambokok taɲaɲ meme le makau fat tuku ndare kilmba tukul wande suɲgo sinam kine ndakina. Nu nuɲe ndare tumba ka ndare tamba sine piyasiɲmba sine tuku muskil nduiye kile-tidiɲgina.

¹³ Maɲau ambokok dubimba nane meme le makau pailnu tuku ndare kilmba makau paɲgar fatnu pasokinaig tuku kuke tugu ta tur mbilmba taɲgo nu wam afu mbolɲge kutur kilanu ta nane mbolɲge bareɲniɲginaig. Bareɲniɲginaig le naɲgine ɲgarosu tuku kutur saukinaig.

¹⁴ Kristus tuku ndareɲge agaɲmor ndare tuku piro lite. Nu purfeɲnu ndo minmba nuɲe minmba minam tuku maɲau tuku saɲgri mbolɲge nuɲe ɲgarosu kumam tuku pilmba Kuate atraukina. Wam afu dubikeg le tur ndasiɲgig le wamdus

piti ñak mineg ta nuñe ndarembi mbar ta ñakmba sauke suluwa le sine ñgamunjal mukuk ñak Ku-ate mbariñam kumuñ. ¹⁵ Pasa kitek Kuate katna ta kile Kristus nu alonu kile-mayokkate. Nu tuku kume mbolñge pasa ambonja katna ta kum-nemñge minmba mbarde mbal muskil kile-tidiñge niñgit. Kile Kuate nu o buk sakina tañamba nu wikade mbal ñakmba nuñe wam magenu kilam tuku minig.

¹⁶ Tanjo ande ñgumneña ye kumi le ye tuku agañ ndende yiñe mbalñge kilam tuku ñga idusmba nu wañe ande kuyarmba pilit. Tanjo ta nu kumit le ndo nu tuku agañ ndende kuembol walmba kilig. ¹⁷ Nu nuñe pasa kuyarte sulumba nu abo minit ta kuyar ta alo kugatok tañañ minit. Nu kumit le ndo alonu mayok kinit. ¹⁸ Wam ndui ta ndo Kuate nu pasa o buk tanjo ndoñ katna ta alonu mayok kuwa ñga tane agañmor bale farap ñgina. Ndare tambi pasa katna ta tugu pilnaig ta teñenmba. ¹⁹ Moses nu tukul pasa ñakmba tanjo pino saningina sulumba nu makau fat le meme tuku ndare kilmba kule tur mbilna. Tañamba nu sipsip ñguenu gurgur kilmba hisop ail wañenu tur kusmba pilna le ndare sinam kina. Kina le tumba bareña le tukul kuyaranu wañe tanjo turmba mbol kinaig. ²⁰ Tañamba Moses ndek sakina: Tane dubikam tuku Kuate nu tane ndoñ pasa katna ta ndare tembi tugu pilit ñgina.

²¹ Nu wam kina tañamba ndo ndare ta tumba ka tawi wande sinamñge Kuate atraukam tuku agañ ndende ñakmba mbolñge bareñningina. ²² Moses tuku tukul mañau ta sinamñge kutur ñakmba

mayok kinaig ta ndarembi ndo saukinaig. Ndare kutu ndate ta tanjo tuku une sau ndakate.

Yesus nu kumba sine tuku une saukina

²³⁻²⁴ Manau ambokok sinamnge nane agam mor ndarembi kutur saukinaig. Manau ambokok ta samba mbolok manau kube ndo naig. Kristus nu kilke te mbolok tuku tukul wande sinam kine ndakina. Nu samba mbolok tuku wande tugusek ta sinam kina sulumba kile sine turkam tuku Ku-ate tugumnge minit. Ta tuku samba mbolok agam ndende agam mor ndarembi kutur saukam kumun kuga. Atrau agam purfen numbi ndo kutur saukam kumun.

²⁵ O buk yar kidemba ki ait ndindo mbolnge pris sunjo nu tukul wande sunjo sinam kambim nga nuje ndare tumba kine ndakina. Nu agam mor ndare kilmba kambinu. Kristus nu tana ndana. Nu nuje ngarosu kumam tuku palmbim nduina sulumba nuje ndare tumba samba mbolok tukul wande sinam kina. ²⁶ Nu wam ta ke ndakina kande Kuate nu kilke te-mayokna ait ta mbolnge nu tugu pilmba kume tutur-tuturmba ka kile tanjamba minit kande. Ait kugawam tuku ait te mbolnge nu mayok kina sulumba nuje ngarosu tambi une nakmba sauke suluwam tuku Kuate atraukam nduina. ²⁷ Tanjo nakmba kume ndui-waig sulumba Kuate nu nane pileningam tuku ait tairnga minamngaig. ²⁸ Tanjamba ndo Kristus nu nuje ngarosu pilna le nane nu balenaig le nu kumam nduina sulumba tanjo gudommba tuku une saukina. Nu man luka prowamngat ta une saukam tuku prowe nda. Sine nu minde mineg mbal sine tuku muskil kile-tidinge singam tuku prowamngat.

10

¹ Tukul maṅaunḡe samba mbolok tuku tugusek maṅau tuku alonu kile-mayok ndakate. Nu wam tugusek tuku kanunu ndo. Ta tuku nane tukul dubimba yar kidemba agaṅmor ndui ta ndo kilmba bale farmba atrauka Kuate am mbolḡe kumumbi mayok kine ndakade. ² Nane kumumbi mayok kinaig kande nane une tuku piti kamus ndamba agaṅmor maṅ kilmba bale farmba atrau ndakinaig kande. ³ Nane yar kidemba une saukam tuku agaṅmor kilmba bale farnḡmba atraukinaig sulumba naṅgine une ta idusmba minanu. ⁴ Makau pailnu le meme tuku ndarembi une saukam kumuṅ kuga. ⁵ Ta tuku Kristus nu kilke te mbol prona sulumba nu Kuate sana:

Nane agaṅmor kilmba bale farmba agaṅ kise kise ne tanmbim tuku patikade wam ta ṅakmba ne nzali ndanate. Ta tuku ne ye ṅgarosu te sina.

⁶ Nane agaṅmor kilmba bale farmba ṅak pasokade ko naṅgine une idusmba agaṅmor bale farmba atraukade wam ta ṅakmba ne nda nzalinate.

⁷ Ta tuku ye ne sanamḡgit. Kuyar pasa ye tuku taṅamba sakate ta ye prowen te ne tuku nzali ṅakmba dubikam tuku minet. *Mune 40.6-8*

Kristus nu taṅamba Kuate sana.

⁸ Kristus tuku pasa ta tugunu teṅenmba. Nu ambonḡa sakina: Agaṅmor kilmba bale farmba agaṅ kise kise ne tanmbim tuku patikade wam ta ne nzali ndanate. Agaṅmor kilmba bale farmba ṅak pasokade ko afu naṅgine une tuku atraukade

mañau ta ñakmba ne nda nzalinate ñgina. Nane tukul mañau dubimba mañau ñakmba ta kinaig ta ⁹ Kristus nu mañ pasa tuturmba sakina: Ye prowen te ne tuku nzali ñakmba dubikam tuku minet ñgina. Nu mañau kitek Kuate tuku nzali ñakmba dubikam tuku ta mayok kuwa ñga tukul mañau tuku piro te-sina. ¹⁰ Kristus nu Kuate tuku nzali ta dubimba nuñe ñgarosumbi Kuate atraukam nduina. Tañana le Kuate tuku nzali mayok ka Yesus Kristus tuku kume mbolñge sine nu am mbolñge kumumbi mayok kageñ.

¹¹ Tukul mañau mbolñge pris mbal nane tawi wande sinamñge mara mindek tanje piroka tiñ minig. Nane agañmor ndui ta ndo kilmba bale farmba atraukade ta agañmor ndarenunje tanjo tuku une saukam kumuñ kuga. ¹² Kristus nu tanjo tuku une saukam tuku nu nuñe ñgarosu kumam tuku pilmba Kuate atraukam nduina. Nu tuku atrau agañ une saukam tuku sañgri minmba minamñgat. Nu tañana sulumba nu Kuate tuku ndinam kumamñge minyoka ¹³ Kuate nu nuñe ñgueu mbal ñakmba kile-ibenka nu kumnemñge patikam tuku tairñga minit. ¹⁴ Nu nuñe ñgarosu atraukam nduina le sine nu mbolñge purfeñnu mayok king mbal Kuate am mbolñge kumumbi minmba minamñgig. ¹⁵ Tukul Guwa nu wam ndui ta ndo tumsingit. Nu ambonja teñemba sakina.

¹⁶ Ye Sunjo ye sakamñgit. Ait ande prowa le ye pasa kitek teñemba Israel mbal ndon katamñgit. Ye yiñe tukul pasa ñakmba nane dubi magekam tuku nane tuku ñgamunjal sinamñge patike likamñgit ñgina. *Yeremia*

31.33

¹⁷ Tukul Guwa nu lato maᅇ tenᅇnmba sakina.

Ye nane tuku une wam ᅇaigonu ᅇakmba
gilainᅇamᅇgit ᅇgina. *Yeremia 31.34*

¹⁸ Kuate nu sine tuku une ᅇakmba sauka gilainᅇina
tukunu une saukam tuku atrau aᅇaᅇ nu piro ku-
gatok minit.

Sine Kuate tugum kab

¹⁹ Tira kame, Yesus nu nuᅇ ndarembi sine tuku
une ᅇakmba sauke suglukina. Ta tuku kile sine
kuru kuru ndaka ᅇgaro bulok samba mbolok tukul
wande sunᅇo sinam kumba Kuate tugum kab.

²⁰ Sine Kuate tugum kambim tuku Yesus nu nuᅇ
ᅇgarosu atrauka ndin kitek wakeina. Ndin ta abo
ᅇak minmba minam tuku. ²¹ Nu pris sunᅇo mayok
ka sine Kuate tuku mbal kulatkate. ²² Nu sinᅇine
mbar tuku piti sauke sulumba kule purᅇᅇnumbi
sine tuku ᅇgarosu ᅇakmba minyanᅇina. Ta tuku sine
wamdus ndindo tumba Kristus tuku sanᅇri tomba
tiᅇga ᅇgarosu bulok Kuate tugum kab. ²³ Sine
nu tuku pasa tuku alonu tairᅇga mineᅇ ta kusre
ndamba biye debe. Kuate nu sinᅇka nuᅇ pasa
dubimba sinᅇine muskil kile-tidiᅇᅇ sinᅇamᅇgat.

²⁴ Sine tira kame nane afu ᅇgamunᅇal niᅇgam
tuku afu mbolᅇᅇ maᅇau magenu ke likam tuku
sinᅇine sinᅇine ᅇgamunᅇal kuagnekube. ²⁵ Sinᅇine
mbal afu Kuate mbariᅇam tuku maᅇgur ndakade
ta sine taᅇa ndabe. Sine maᅇgurka sinᅇine sinᅇine
tira ndoᅇ munᅇu sanᅇri pileniᅇbe. Sunᅇo prowam
tuku ait buk patukate. Ta tuku sine mara mara
maᅇgurkube.

Kristus ᅇgumnewam tuku maᅇau

²⁶ Sine Kuate tuku pasa tugusek ismba kila pilmba siŋgine nzali ndo dubimba wam ŋaigonu kumba mineg ta atrau aganj ande une saukam tuku mine ndakate. ²⁷ Sine taŋamba mineg ta sine pilesiŋgam tuku ait Kuate nuŋe ŋgueu mbal kilmba pa kame ŋayo mbol pankamŋgat ta tairŋga minbe.

²⁸ Taŋgo ande nu Moses tuku tukul pasa ande ake aganj taŋanj ŋga lukamba likina ta taŋgo armba ko keŋmba nu kaŋgermba nu tumba ka pasa mbolŋge te-timba nu mape ndamba balewanu.

²⁹ Ande nu Kuate tuku Kiŋo ŋgumnete ta siŋka nu ŋgaro mukuk mine nda. Yesus nuŋe ndare kutuna le Kuate nu pasa kitek katna ta alonu mayok kina. Nane ndare ta ake aganj ŋgade ta ndare ta mbolŋge ndo nane purfeŋnu mayok kambim tuku nu kumna. Tukul Guwa nu nane ake sinaŋ make patikam iduste ta nane nu tumail pande. Mbal ta nane siŋka pa suŋgo tam tuku minig.

³⁰ Kuate nu pasa teŋenmba sakina: Maŋau ŋaigonu lafunu ta ye tuku piro. Yeŋge pa niŋgamŋgit ŋgina ta sine ŋakmba kila. Nu lato pasa ande mata sakina: Ye Suŋgo. Ye yiŋe mbal ŋakmba pileniŋgamŋgit ŋgina. ³¹ Ande nu Kuate minmba minit nu tuku pa kaŋgerwa sulumba ose. Nu kuru kuru suŋgo tamŋgat.

Sine saŋgri tiŋga dirnaŋgube

³² Ambonga bulu mayenu tane tugum prona le tane piti sugo afu pronaig ta tane saŋgri tiŋga dirnaŋga minnaig. ³³ Nane tane kilmba taŋgo am mbolŋge kile-tidiŋga piti sugo tiŋmba tane tumail pantiniŋganaig. Mara afu taŋgine tira afu mbolŋge taŋanaig ta tane kuru kuru ndaka nane ndoŋ

ulendikinaig. ³⁴ Nane afu muliŋ kilanu minnaig ta tane nane ndoŋ piti kuranaig. Nane afunġe tane tuku aġaŋ ndende ake kilmba ŋaigo siglikinaig ta tane ta tuku wamdus piti suŋgo nda tinaig. Aġaŋ kame ta kilke te tuku aġaŋ ndo ŋga taŋgine samba mbolok aġaŋ ndende magenu minmba minam tuku ta idus tidiŋginaig. Taŋgine maŋau mayenu ta gilai ndaŋgap.

³⁵ Tane saŋgri tiŋga dirnaŋga taŋamba ndo minap ma ma lafu mayenu tamŋgaig. ³⁶ Maŋau tamba ndo Kuate tuku nzali ŋakmba dubikap sulumba wam mayenu prowamŋgat ŋga sakina ta tamŋgaig. ³⁷ Kuate tuku pasa te tane isap.

Ande prowamŋgat ta nu dalke nda. Mine minemba prowamŋgat.

³⁸ Yiŋe taŋgo tiŋreknu nu ye ndo idusyumba ye kumuŋ ŋga saka minwa. Nu kuru-kuruka lukuwa ta ye nu nzaliwe nda. *Habakuk 2.3-4*

Kuate tuku kuyar pasa taŋamba sakate. ³⁹ Tira kame, afu kuru-kuruka luka ŋgisikade ta sine nane taŋaŋ kuga. Sine Kuate tala ndamba nu kumuŋ ŋga abo ŋak minmba minam tuku mbal mineg. Ŋgisike nda.

11

Kuate tuku saŋgri tomba tiŋgam tuku mbal

¹ Sine Kuate tuku saŋgri tomba tiŋgeg wam ta tugunu teŋenmba. Sine wam kame tairŋga mineg ta siŋka kilamŋgig ŋgeg. Aġaŋ ndende ammbi kaŋger ndakeg ta sonndo minig ŋga ŋgamuŋġalmbi iduseg. ² Siŋgine mbuŋ kame nane maŋau ndui ta

ņak minnaig le Kuate nu nane tuku gare ņak nyu sugo niņgina.

³ Sine Kuate kumuņ ņga sakeg ta nuņe pasambi samba kilke kile-mayokkina ta sine kila. Sine agaņ ndende ammbi kaņgerkeg te nu agaņ ammbi kaņger ndakeg tambi nu kile-mayokkina ņgeg.

⁴ Abel nu Kuate tuku saņgri tomba tiņga agaņmor tumba atraukina. Atrau agaņ taņge Kain tuku atrau agaņ lina. Kuate nu Abel tuku atrau ta kaņgermba nzalina le nu taņgo tiņreknu ņga nu tuku nyu te-mayokna. Nu o buk kumna ta nuņe maņau mayenu taņge sine tumsiņmba minit.

⁵ Enok nu Kuate tuku saņgri tomba tiņgina ta nu kume ndakina. Kuateņge nu ņgarosu ņak tina le afu nu tuku mindesiņ kaņgeram tuku sotete piņeņginaig. Kuate nu Enok nda tina sulumba nu tuku gare suņgo tina. Kuyar pasa taņamba nu tuku sakate. ⁶ Ande nu Kuate talate ta nu Kuate gare tambim kumuņ kuga. Ta tuku ande nu Kuate tugum kambim ņga Kuate nu siņka minit ņguwa. Ne nu sota le nu ne mbolņge wam mayenu kaņgat ņga idusa.

⁷ Kuate nu wam ņgumneņga prowam tuku Noa riroņ pasa sana ta nu ismba Kuate tuku pasa son ņga nu nuņe ndare mage minam tuku waņ ande kusna. Noa tuku maņau taņge kilke mbolok mbal tuku maņau ņayonu kilimok te-mayokna. Kuate nu kumuņ ņgina ta nu am mbolņge kumumbi mayok kina.

⁸ Kuate nu Abraham nuņe ma kusremba ma kise ande tambim tuku sana le nu Kuate tuku saņgri tomba tiņga nuņe ma kusremba kina. Ma nu kambim tuku ta nu gilai. Ake tiņga kina.

⁹ Kuate nu ma tambim tuku sakina ta mbol prona sulumba nu Isak le Yakob ndoŋ rawe taŋgo taŋaŋ minmba baibai ndo patikinaig. Abraham Kuate nu kumuŋ ŋga ma tam tuku wamdus bulok tairŋga minna. ¹⁰ Kuate nu samba mbolŋge tumbraŋ mayenu minmba minam tuku pilna ta Abraham nu tumbraŋ ta ndo idusmba wamdus bulok ŋak tairŋga minna.

¹¹ Kuate nu pasa saŋgrinu sakina le Abraham piyo nuŋe Sara nu ismba Kuate nu kumuŋ ŋgina. Ta tuku nu saibo pile mayemba kiŋo tam tuku ait lina ta nu kiŋo konna le saŋgri tiŋga fungulok minna. Kuate nu siŋka nuŋe pasa kumuwaŋgat ŋga nu taŋana. ¹² Wam ta mbolŋge taŋgo ndindo ta saibo pile mayemba kumam tuku ait patukina le nu tuku mbuŋ gudommmba mayok kinaig. Samba mbolŋge mbai minig piyaŋge fulbul minig taŋaŋ burnu kumuŋ kuga.

¹³ Abraham nane Kuate tuku pasa ismba nu kumuŋ ŋga saka minnaig ma ma alonu kaŋger ndamba kume likinaig. Nane pasa ndo ismba ŋgumneŋga alonu prowamŋgat ŋga nane kila minmba gare ŋak kume likinaig. Nane kilke te mbolŋge minmba sine rawe taŋgo taŋaŋ mineg ŋginaig. Siŋgine tumbraŋ tuguk kilke te mbolŋge mine ndakate ŋga saka minnaig. ¹⁴ Taŋaka saki-naig mbal ta nane tumbraŋ ande minam tuku sota wamdus te-mayoknaig. ¹⁵ Naŋgine tumbraŋ o buk kusrenaig ta luka kambim kumuŋ ta nane tumbraŋ ta idus ndanaig. ¹⁶ Nane ma kise mayenu ndo sota minnaig. Ma ta samba mbolok. Nane Kuate nu sine tuku Mbara ŋginaig le nu nane tuku nyu

yabu ndaka samba mbolŋge tumbran ta kuaneke niŋgina.

¹⁷⁻¹⁸ Kuate nu nuŋe kiŋo Isak tuku teŋenmba Abraham sana: Isak mbolŋge ndo ne tuku mbun mayok kaŋgaig ŋga sana. Nu Abraham tuku ŋgamunŋal son tagona le nu Kuate tuku sanŋri tomba tiŋga nuŋe kiŋo ndindo balemba luka Kuate atraukam bafuna. ¹⁹ Nu teŋenmba idusna: Isak nu kumwa ta Kuate nu te-tiwamŋgat ŋgina. Ta tuku Isak nu kume ndakina ta nu kumanu taŋaŋ mam nuŋe nu maŋ luka tina.

²⁰ Isak nu Kuate nu kumuŋ ŋga nuŋe kiŋo armba Yakob le Esau wam ŋgumneŋga mayok kaŋgaig ta tuku nyaro pasa nikina.

²¹ Yakob nu minmba ka kumam bafuna sulumba Kuate nu kumuŋ ŋga nu nuŋe wa kame Yosef tuku kiŋo armba wam ŋgumneŋga mayok kaŋgaig ta tuku nyaro pasa nikina. Nu nuŋe ndumndum biymba tamba ŋgaro sanŋri pilemba loka Kuate tuku nyu te-duŋga nu nale nyaro pasa nikina.

²² Yosef nu minmba ka kumam bafuna sulumba Kuate nu kumuŋ ŋga Israel mbal Isip kusrewam tuku saningina: Tane Isip kusremba ye tuku isu kilmba kumba taŋgine ma kitek mbolŋge ŋgukap ŋgina.

²³ ŋgumneŋga Moses tuku ina mam nu te-pilmba kiŋo mayenu ŋga Kuate tuku sanŋri tomba tiŋga Farao tuku tukul pasa kuru kuru ndaka nu yubenŋginaik le tambun keŋmba minna.

²⁴ Moses nu sunŋokina sulumba Kuate nu kumuŋ ŋga nu Farao tuku wa ŋga nyu sunŋo tunaig wam ta ŋgumneŋga. ²⁵ Kilke te tuku nzali ŋaigonu

ait fagnu ndo minam tuku ta ngumneniŋgina su-
lumba Kuate tuku mbal sinamanzer sunjo min-
naig ta nane ndoŋ ulendikina. ²⁶ Nu Isip mbal
tuku agan ndende magenu kilam tuku ta agan
nai fudiŋndo tanaŋ nga mbulmba pitaikina. Nu
afunje tumail pannaig ta nu Kristus tuku idusmba
ngamuŋgal mukuk nak minna. ²⁷ Nu Kuate tuku
sanjri tomba tija Farao tuku gubra kanjermba
kuru kuru ndaka sanjri tija Isip kusrena. Sine
siŋgine ammbi Kuate kanjeram kumuŋ kuga ta
Moses nu Kuate kanjeranu tanaŋ sanjri tija
minna. ²⁸ Kuate nu kumuŋ nga nu Pasowa ait
sunjo tugu pilmba kame enel nu Israel mbal tuku
kiŋo mulum mapeka bale far ndakuwa nga nu
nane saniŋgina le nane sipsip baleniŋmba ndarenu
kilmba naniŋgine wande malaŋga pisneniŋginaig.

²⁹ Israel mbal nane Kuate nu kumuŋ nga Yu Gur-
gur ngamuŋge bablakina le sim kinaig. Isip mbal
nane mata sim kambim tuku tagomba kinaig ta
nane nakmba ngisikinaig.

³⁰ Ngumneŋga Israel mbal Kuate nu kumuŋ nga
Yeriko tumbran mara 7 laipnaig le ndame fonde
sambrika guronaig.

³¹ Yerikonu pino Rahab tango didik farmba
minna tuku ta nu Kuate kumuŋ nga Israel tango
armba tumbran ta katesewam pronaik le nu nale
turka yubengina. Ta tuku nuŋe ngueu mbal kame
pronaig ta nane Yeriko mbal nakmba bale farka nu
mapemba bale ndanaig.

³² Ye nane gudommba tuku wam kubewam ku-
muŋ. Gideon Barak Samson Yefta David Samuel
tuan tango nakmba satinŋam tuku ta ye ait kuga.

³³ Mbal ta nane ɲakmba Kuate nu kumuɲ ɲga teɲenmba ke likinaig. Afu nane kilke kisekok mbal ndoɲ kame bumba nane kile-ibenɲkinaig. Afu saɲgri tiɲga maɲau tiɲreknu ndo mayok kambim tuku pirokinaig. Afu Kuate nu nane mbolɲge wam magenu kam tuku sanɲgina ta alonu tinaig. Afu nane laion tuku miɲge tukulɲɲinaig. ³⁴ Nane afu pa suɲgo sinamɲge patikinaig ta kume ndakinaig. Afu naɲgine ɲgueu mbalɲge bagimbi bale faram bafunaig ta nane saɲgri tiɲga kua kinaig. Afu saɲgri kugatok ta Kuate tuku saɲgri mbolɲge saɲgri tiɲginaig. Nane kame buwam tuku saɲgri tinaig le kilke kisekok mbal nane kua kinaig. ³⁵ Pino afu naɲgine kutu kummba maɲ aboɲginaig le kilnaig.

Kuate tuku saɲgri tomba tiɲginaig mbal afu piti yimyam kaɲgerkinaig. Nane afuɲge nane Kuate kusrewaig ɲga ɲgarosu rar suɲgo niɲginaig le abo tugu kitek tam tuku saka Kuate kusre ndamba rar suɲgo kamusmba ma ma kume likinaig. ³⁶ Afu kilmba amseseniɲmba muli kareɲnumbi ɲgusniɲge likinaig. Afu muliɲ kilmba wandekɲge patikinaig. ³⁷⁻³⁸ Nane afu ndamembi bale farnɲginaig. Afu so suɲgombi ɲgamuɲge kat pugurkinaig. Afu kame bagimbi bale farnɲginaig. Kuate tuku mbal ta sipsip ko meme tuku ɲgaro fulka tiɲge lika minnaig. Nane piti yimyam kilmba kua ka ma baknu mbolɲge tabe poɲ pilemba ndame burok ko kilke burok sinamɲge nane kuirka sinamanzer suɲgo tumba mine likinaig. Kuate tuku mbal ta nane kilke mbolok mbal ndoɲ ulendikam mbulnaig.

³⁹ Nane ɲakmba Kuate nu kumuɲ ɲga dirnaɲga saka minnaig ta Kuate nu nane tuku gare ɲak

nyu sugo ningina. Kuate nu wam mayenu kam tuku sakina ta nane alonu kanjer ndanaig. ⁴⁰ Ta ndanam? Kuate nu sine tuku ait mbolnge wam mayenu te-mayokam tuku idusmba nane sine tairnguwaig le sine kumu kumu muskil kile-tidinge singamngat.

12

¹ Sine nane Kuate tuku sangri tomba tinginaig mbal ta tuku manau mayenu ta idusningmba singine nzali yimyam ngumneningmba ame unenge sine didikate ta kusreka sine tango kame usre mbolnge dirnanga pinderka piya mayenu tam idusde tana² singine wamdus Yesus ndo idus timba minbe. Sine ngamungal son teg ta Yesus mbolnge teg. Teg le ka sangri tingate ta nunge sangri pilete. Yesus nu ngumne³ga gare sungo tam tuku idusmba ail kazrai tuku kume kiko sungo ta tanaig nga kura⁴mba kumna. Kummba tingina sulumba kile nu Kuate tuku ndinam kumamnge nyu sungo njak minit.

³ Mbal najgonu nane Yesus kasurmba nu tuku nyu njayo silinaig ta nunge sangri kusremba baklel ndana. Tane Yesus tuku manau ta idusmba tangine sangri tingade wam ta kusreka baklel ndawap. ⁴ Tane manau tinreknu dubiwam tuku sangri tingade le afunge wam ta tuku tane kilmba bale far ndade. ⁵ Kuate nu pasa ande tane piti sinamnge sangri tingam tuku sakina ta tane gilaingade nga iduset. Kuate nu tane nunge kinjo kame tuku tenemba sakina.

Yine kinjo, ye ne te-tinam tuku pa tinet ta talaka nda isanu sukmba mine ndaka.

Ye ne sane liket ta san̄gri kusremba baklel ndawa.

⁶ Ye Sun̄go. Ye teñenmba ket. Ye ande tuku kume purmba minet ta ye nu te-tiwam tuku pa tuwet.

Ande nu yiñe kiño nga tet ta nu mayenu mayok kambim tuku ye nu nguset. *Sindaun 3.11-12*
Kuate nu tañamba sakina.

⁷ Tane Kuate tuku pa kamusde ta nu sine kile-tidingam tuku tañate nga san̄gri tingap. Tane Kuate tuku kiño kame minig sulumba nu tuku pa kamusde. Kiño ima nu mam nuñe tuku pa kamus ndate? ⁸ Kuate nu nuñe kiño kame kile-tidingam tuku pa niñgit. Tane nu tuku pa kamus ndawap ta tane nu tuku kiño kame nda minig. Tane ma ngamukok kiño kame tañañ minig. ⁹ Singine kilke mbolok mam kame nane sine kile-tidingam tuku pa siñginaig ta nane kumumbi kade nga nane kumnemñge mingen. Singine samba mbolok Mam nu siñgine kanu kulatkate sine pa siñgit ta sine siñka wamdus bulok ñak nu kumnemñge minbe. Ta mbolñge sine mine mayenu tamñgig. ¹⁰ Sine kiño kame mingen le siñgine mam kame sine kile-tidingam tuku nan̄gine wamdus fagnu tambi pa siñginaig. Singine Mam Kuate sine nu ndoñ purfeñnu tuma minbe nga wam mayenu ta tam tuku nu pa siñgit. ¹¹ Singine Mam sine pa sun̄go siñgit le ta sinamñge sine gare kugatok ngamun̄gal rar ñak mineg ta ima nu pa ta mbolñge san̄gri tingate ta ngumneñga nu alonu kan̄gerka nu wamdus bulok ñak minamñgat. ¹² Ta tuku tane pa ta kamusmba baklel ndaka san̄gri tingap. ¹³ Tane wamdus san̄grinu pilmba man̄jau tiñreknu ndo ke

likap. Tanjawap le tane tuku afu sanjri kugatok ta nane sanjri tinjamngaig.

¹⁴ Tango njakmba ndonj wamdus bafumbi minam tuku wamdus sanjrimba palpe. Tane tinjeknu mayok kambim tuku wamdus ndindo pilmba dirnanjgap. Ande nu tinjeknu mayok ndakuwa ta nu Sunjo kanjgere nda. ¹⁵ Tane kurau mayewap. Kuate nu ake sinanj tango make patikate wam ta ande nu liwikat. Ko tane tuku ande wamdus njgheu njak mayok ka tane njakmba njaijo siglikuwa le tane kutur tubekaig. ¹⁶ Tane kurau mayewap. Ande nu fare fare pino kame ndonj unekumba minikat. Ko ande nu Esau tananj Kuate tuku wam ake aganj tananj nga bukngikat. Esau nu kinjo mulum tukunu mam nunenje Kuate tuku nyaro pasa nu tambim tuku minna. Ait ande mbolnje nu gubana le nyamaganj piyanu mambo nune nyaro pasa ta tuna. ¹⁷ Ngumnenja nu nyaro pasa bukngina ta luka tam tuku nu malmbi sunjo tumba mam nune kusnana kande nu tambim kumuñ kuga. Nu manj njgamunjal biye mbilam tuku ndin kirinjina. Tane njakmba Esau tuku wam ta kila.

Sine samba mbolok aganj ndende tugum proweg

¹⁸ Israel mbal o buk Sinai tabe tugum promba nanjine ammbi aganj ndende kanjgerkinaig. Tabe ta mbolnje pa bulu sunjo mayok ka ma furir sunjo ndeka bubre sanjri njayo tinja minna. ¹⁹ Ta sinamnje tabil sinjon sunjo mayok ka Kuate tuku minje pasa ande prona le tango pino nane pasa ta ismba kuru kuru sunjo tumba Moses sarsarriba sanaig: Sine pasa ta lato isam mbulig njinaig. ²⁰ Kuate nu rironj pasa ande tenjenmba sakina:

Aganmor ko tanjo tabe te tugum prowa kande mape ndamba ndamembi balewap ngina.

²¹ Wam mayok kinaig ta nane kanjerka kuru kuru sunjo tinaig le Moses nu mata sakina: Ye kuru kuru sunjo tumba isu piririwet nga sakina.

²² Tane pasa kitek sinamnge minig mbal tabe ta tugum pro ndade. Kuga. Tane Kuate abo tugu minmba minit nu tuku tumbran Sion tabe tugum prode. Tumbran sunjo ta Yerusalem kitek samba mbolnge minit. Tumbran ta sinamnge enjel gudommba mangur sunjo pilmba gare-gareka minig. ²³ Mbal afu Kuate tuku kinjo kame ambonga mayok kinaig nu samba mbolnge nane tuku nyu kuyarkina ta nane mata tanje mangurkade. Kuate nu tanjo nakmba pilesingit ta nu mata tanje minit. Nane Kuate tuku mbal tinreknu buk kumumbi mayok kine likinaig ta nane tuku kanu mata minig. ²⁴ Yesus nu mata tumbran ta mbolnge minit. Kuate nu pasa sangrinu kitek katna ta nunge alonu kile-mayokkate. Nunje ndare kutuna tanje Abel tuku ndare witina ta lite.

²⁵ Ta tuku tane kurau mayewap. Ande nu pasa tumsingit ta tane pitaibekaig. Moses nu kilke te mbolnge Kuate tuku riron pasa saningina ta ande nu ismba nda isanu sukmba pitaiwa ta nu pa tamngat. Kile Yesus nu samba mbolnge riron pasa sasingit ta ande nu pasa ta nda isanu sukmba pitaiwa ta nu pa sunjo te nda nga iduste e? ²⁶ O buk Kuate nu Sinai tabe mbolnge nunje pasa Moses ndon katna le kilke te buru-burukina. Kile nu pasa sangrinu sakate: Ye kilke man nduiye buru-buruwamngit. Kilke ndo kuga. Samba turmba buru-buruwamngit ngate. ²⁷ Kuate nu ye

maŋ nduiye buru-buruwamŋgit ŋgate ta tugunu teŋenmba. Nu agaŋ ndende kile-mayokkina te buru-buruniŋguwa le ŋakmba ŋgisikamŋgaig. Agaŋ ndende buru buru ndakuwaig ta ndo kilmba patikuwa le minmba minamŋgaig.

²⁸ Sine Kuate tuku gageu mayok kageŋ mbal singine tumbraŋ tugusek samba mbolŋge buru-buruke nda. Ta tuku sine Kuate tuku gare pasa tube sulumba nu kuru-kuruka nu kumnemŋge minmba nu tuku nyu te-dunŋube. Mbariŋ maŋau ta nu nzalite. ²⁹ Singine Mbara pa suŋgo tigli ŋakmba pasokate taŋaŋ minit.

13

Kuate gare tambim tuku maŋau

¹ Taŋgine tira mbal ŋgamunŋal muŋgu niŋge- niŋgekam tuku maŋau kusre ndawap. ² Mbal afu ma kisekok tane tugum prowaig kande tane nane kulat magekap. Nane afu buk taŋanaig ta nane eŋel kame kulatkinaig ta nane katese ndanaig. ³ Tane tuku afu muli wandekŋge minig ta tane nane ninanka nane ndoŋ piti tuma kurawanu taŋaŋ minap. Ko afuŋge tane tuku afu rar niŋgig ta nane mata ninanka nane ndoŋ rar tuma kamu- sanu taŋaŋ minap. Tane mata piti ndui ta kile- siglikubekaig.

⁴ Pino taŋgo ndoŋ muŋgu kilik maŋau mayenu ta ake agaŋ ŋga idus ndamba kurau mayewap. Ande nu maŋau ta purte ta nu mbar suŋgote. Pino taŋgo ŋak ko mbanzonu kuayarde mbal Kuate nu nane ŋakmba pileniŋgamŋgat.

⁵ Tane ndametiŋ kilam tuku piriri ndawap. Tane agaŋ ndende ŋak minig ta te kumuŋ ŋga idusap. Kuate nu teŋemba sakina: Ait ŋakmba mbolŋge ye ne ndoŋ minmba kusrene nda ŋgina.

⁶ Ta tuku sine Kuate tuku pasa ta idusmba sine miŋge bulokmbi teŋemba sakube.

O Sungo, ne mara mara kumumbi ye turyate.

Ta tuku ye taŋgo tuku ŋgueu maŋau kuru kuru ndaket.

Mune 118.6

Sine taŋamba sakube.

⁷ Taŋgine gabat kame Kuate tuku pasa mayenu tumsinginaig ta nane Kuate biye demba minnaig ma ma kume likinaig. Nane Kuate tuku saŋgri tomba tiŋginaig wam ta idusmba kubewap.

⁸ Yesus Kristus mbilka kise mayok kine nda. Nu buk minna kile minit ŋgumnenga ndui ta ndo minmba minamŋgat.

⁹ Tane rironŋkap. Nane afunge wam pagu pasa kise tumtiŋguwaig le tane nane dubikubekaig. Nane nyamagaŋ tuku tukul ndo dubikam tuku tumtiŋgig. Maŋau ta dubide mbal maŋau taŋge nane tur ndakate. Kuate nu sine ake sinaŋ make patikate wam taŋge siŋgine ŋgamuŋgal saŋgri pilete. ¹⁰ Sine atrau mbain kitek ŋak. Nane kilke te mbolok tawi wande tuku maŋau dubide mbal siŋgine atrau mbain kitek ta mbolŋge nyamagaŋ tumba nyam tuku nyu kugatok. ¹¹ Israel mbal tuku pris sungo nu agaŋmor tuku ndare kilmba taŋgo pino tuku une saukam tuku nu tukul wande sungo sinam kina. Nane agaŋmor ta ndemnu ŋakmba kilmba tumbraŋ sungo kusremba kilimŋge pasokinaig. ¹² Wam ndui ta ndo Yesus mbol prona.

Nane nu tumba ka Yerusalem tumbran sungo kilimnge rar sungo tumba ail kazrai mbolnge bale-naig le kumna. Kummba nuṅe ndarembi sine tuku une saukina le purfeṅnu mayok kageṅ. ¹³ Ta tuku sine siṅgine maṅau yimyam ambokok ṅakmba kusreka kilim ka Yesus ndoṅ ulendikube. Siṅgine mbal afu talasiṅgig ta sine piti ta nu kurana taṅamba ndo kurabe.

¹⁴ Sine kilke te mbolnge tumbran ande minmba minam tuku mine ndakate. Tumbran sungo ande Kuate nu te-mayokamṅgat ta sine mindemba mineg. ¹⁵ Ta tuku sine mara mara Yesus tuku nyu tumba Kuate tuku nyu te-dunṅube. Maṅau tamba sine ṅakmba atrau agaṅ balemba Kuate atraukanu taṅaṅ keg.

¹⁶ Nane afu mbolnge wam magenu kam tuku gilai ndaṅgap. Afu nane agaṅ ndende denkade ta taṅgine agaṅ ndende tamba turkap. Maṅau kame ta Kuate am mbolnge atrau agaṅ mayenumbi atraukanu taṅaṅ. Nu kaṅgermba gare sunṅote.

¹⁷ Taṅgine gabat kame kumnemnge minmba nane tuku wam pagu pasa dubi mayewap. Nane ṅgumneṅga ka Kuate tugumnge piro ta tuku sakamṅgaig ṅga idusmba nane kurauka tane kulat magekade. Tane nane tuku miṅge dubikade ta nane gare ṅak tane kulatkade. Nane piti ṅak pirokade ta piti ta luka tane mbol kaṅgat.

¹⁸ Sine Kuate am mbolnge mbar tuku wamduṅ piti kugatok ṅga iduseg. Sine maṅau tiṅreknu ndo kam tuku matuk tukulkeg. Ta tuku tane sine tuku ṅga Kuate yabaṅap. ¹⁹ Ye pitik tane tugum prowam tuku tane sunṅomba Kuate yabaṅap.

²⁰ Yesus nu kumna le Kuate tuku pasa kitek minmba minam tuku katna ta nu tuku ndarembi alonu te-mayokna. Tanana le Kuate nu Yesus te-tina le nu nyu sungo tumba Kuate tuku sip-sip kulatkanu tanjo sunjo minit. ²¹ Kuate nu ngamunggal mukuk miro. Tane nu tuku nzali ndo dubiwam tuku nunje wam magenu kumumba tingguwa. Tane Yesus Kristus tuku sangri tomba tingap le sangri tanje Kuate nu tane tuku ngamunggal sinamnje nune nzali njakmba kile-mayokkuwa. Yesus Kristus tuku nyu sunjo ta minmba minwa. Son.

²² Yinje tira kame, ye pasa kuennu tane tuku kuyar ndawet. Ye tane sangri piletingam tuku pasa fagnu kuyaret te tane kilba pilmba ise mayewap.

²³ Timoteus nu mulintinaig ta nu buk mayok kina ta ye tane kila satinjet. Nu pitik ndo ye tugum te prowa ta ye nu ndonj tane tugum prowamngik.

²⁴ Tangine gabat kame Kuate tuku mbal njakmba singine gare pasa te saningap. Tangine tira afu Italinge minig ta nane mata tane gare pasa tingig.

²⁵ Kuate nu ake sinaj tane make patikuwa. Son.

KUATE TUKU PASA
Portions of the Old Testament and The New Testament
in the Siroi Language of Papua New Guinea
Sampela hap Buk Baibel long tokples Siroi long
Niugini

copyright © 1975, 1999 Wycliffe Bible Translators, Inc.

Language: Siroi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 22 Feb 2024 from source files dated 31 Aug 2023

9d2e8659-afb4-5cca-93d8-23ebf89e1709